

Preparasaun ba Ezersísium Harii Hamutuk 2016 kontinua la'ó

29 Setembru 2016

Enjeñeiru sira husi F-FDTL, Austrália no Militar Estadus Unidus, no Forsa Auto Defesa Japaun prepara hela atu hala'ó Ezersísium Harii Hamutuk husi 3 Outubru to'ó 4 Novembru 2016. Durante ezersísium ne'e, enjeñeiru sira sei kompleta projetu dezvoltamentu infrastrutura iha baze militar Hera no Metinaro, inklui comunidade iha área Metinaro.

Membru sira husi nasaun haat refere sei servisu hamutuk hodi konstrui fasilidade militar nian sira hodi hasae kapabilidade F-FDTL nian, nomos hadi'ak Fasilidade Saúde Metinaro nian ne'ebé importante tebes ba comunidade lokal sira. Ezersísium Harii Hamutuk sei fornese oportunidade ba Enjeñeiru F-FDTL nian sira hodi servisu hamutuk ho ekipa konstrusaun sira husi Austrália, EUA, no Japaun atu bele dezvoltave sira nia abilidade lideransa no téknika.

Ezersísium Harii Hamutuk iha 2015 partisipa husi fetu no mane liu 100 no tinan ida ne'e ezersísium refere sei boot liu. Sei iha partisipante husi Enjeñeiru Kombate Rejimentu 1 Austrália nian, Naval Estadus Unidus, Korpu Marina Estadus Unidus, Forsa Auto Defesa Japaun, no foin ba dahuluk Ezersítu Estadus Unidus partisipa iha ezersísium ne'e. Austrália, Japaun, no Estadus Unidus sei oferese enjeñeiru fetu no mane ne'ebé kualifikadu hodi ajuda no treina enjeñeiru F-FDTL no nia unidade sira seluk.

Maske Ezersísium Harii Hamutuk foka liu ba iha enjeñaria no konstrusaun, maibe ba – ezersísium tinan ida ne'e nian mós sei fornese treinamentu ba F-FDTL konabá instrutor fiziku, ekipamentu planta no treinamentu ba motor (mesin) ki'ik oan.

Tinan kotuk, Ezersísium Harii Hamutuk konstrui aula rua, akomodasaun, no hariis-fatin iha Baze Naval Hera ho susesu, inklui hadi'ak fasilidade saúde/klínika comunidade Hera nian. Projetu sira ne'e nu'udar parte husi projetu infrastrutura seluk ne'ebé hala'ó iha ezersísium refere durante ne'e. Enjeñeiru F-FDTL sira benefisia ona ba treinamentu iha abilidade oioin; hanesan hada blok, karpintaria, servisu eletrisidade, kanalizasaun no prepara dokumentu ba transferénsia propriedade.

Oportunidade treinamentu hanesan Ezersísium Harii Hamutuk sai nafatin parte esensial ba Austrália nia Programa Kooperasaun Defeza kontinuadas, Servisu Kooperasaun Defeza Estadus Unidus, no ba Programa Kooperasaun Defesa Japaun nian iha Timor-Leste. Treinamentu kolaborativu ne'e demonstra kooperasaun longu-prazu entre Austrália, Estadus Unidus no Japaun hodi apoiu dezvoltamentu kapabilidade defeza Timor-Leste nian.